

文翰類選

卷之三十三

漢書門類		四七二號	三六函	六九冊
------	--	------	-----	-----

內閣文庫		漢書類	四七二號	三六函	六九冊
------	--	-----	------	-----	-----

內閣文庫		
番號	漢	47.2
冊數	69 (10)	
函號	362	69

0 1 2 3 4 5 6 7 8 9 cm

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



文翰類選大成卷第二十三五言古詩目錄

唐

王無功 四首

王子安 二首

趙冬曦 一首

沈雲卿 一首

沈如筠 一首

盧杲之 三首

宋延清 四首

陳伯玉 十一首

田遊巖 一首

薛嗣通 一首

張道濟 三首

盧子潛 一首

孫逖 一首

張子壽 三首

王摩詰 十九首

劉文房 十首

楊賁 一首

高達夫 二首

崔顥 四首

李頎 三首

儲光羲 十九首

蕭茂挺 五首

崔曙 二首

岑參 二十首

李遐叔 二首

孟浩然 十六首

齊洗心 一首

孟雲卿 一首


常建 一首

盧緯卿 一首

劉脊虛 一首

王少伯 六首

蘇晉 一首



李太白二十首 杜子美九首 賈幼鄰二首
 韋應物三首 郎君胄一首 章嗣立二首
 謝陶一首 武伯蒼一首 賈馳一首
 馬虞臣一首 劉猛一首 吳隱之一首
 李義山一首 綦季通一首 沈下賢一首
 李元賓一首 沈千運一首 朱晝一首
 釋子蘭一首

文翰類選大成卷第二十三目錄

文翰類選大成卷第二十三

左長史上海李伯璵編輯
 伴 讀慈谿馮 厚校正

詩類 五言古

唐

古意三首

王無功

名績絳州人 待詔門下省

幽人在何所紫巖有仙躅月夜橫寶琴此外將安欲材
 抽嶧山榦微點岷立玉漆抱蛟龍脣絲纏鳳皇足前彈
 廣陵罷後以明光續百金買一聲千金傳一曲世無鍾
 子期誰知心所屬

桂樹何蒼蒼秋來花更芳自言歲寒性不知露與霜幽
 人重其德徙植臨前堂連攀八九樹偃蹇二三行枝枝
 自相糾葉葉還相當去來雙鴻鵠栖息兩鴛鴦榮蔭誠

不厚斤斧亦勿傷赤心許君時此意那可忘
綵鳳欲將歸提羅出郊訪羅張大澤已鳳入重雲颺朝
栖崑閬木夕飲蓬壺漲問鳳那遠飛賢君坐相望鳳言
何深德微禽安足尚但使雛卵全無令矰繳放皇臣力
牧舉帝樂簫韶暢自有來巢時明年阿閣上

初春

前旦出園遊林華都未有今朝下堂望池冰開已久雪
避南軒梅風催北庭柳遙呼竈前妾却報機中婦年光
恰恰來滿甕營春酒

懷山

王子安

鶴岑有竒徑鱗州富仙家紫泉漱珠液玄巖列丹葩常
帑披塵網眇然登雲車鸞情極霄漢鳳想疲煙霞道存
蓬瀛近意偃朝市賒無爲坐惆悵虛此江上華

山亭夜宴

桂宇幽襟積山亭涼夜未森沈野迳寒肅穆巖扉靜竹
晦南河色荷翻北潭影清興殊未歸林端照初景

奉和早霽南樓

趙冬曦

閑曙躋南樓凭軒四遐矚物華蕩暄氣春景媚晴旭川
霽湘山孤林芳楚郊縹列巖重疊翠遠岸逶迤綠風帆
摩天根漁艇散灣曲鴻歸鶴舞送猿叫鶯斷續群動皆
熙熙噫予獨羈束常欽才子義忌鵬傷蹇踞雅尚騷人
文懷沙何迫促未知二賢意去矣從所欲

擬古離別

沈雲卿

白水東悠悠中有西行舟舟行有返棹水去無還流奈
何生別者戚戚懷遠游遠游誰當惜所悲會難收自君
闡芳屣青陽四五適皓月掩蘭室光風虛蕙樓相思無

明晦長歎累冬秋離居久遲暮高駕何淹留

寄張徵古

沈如筠

潤州句容人

寂歷遠山意微暝半空碧綠蘿無冬春彩煙竟朝夕張
子海內奇耐為巖中客聖君勞夢想安得老松石

贈李榮道士

盧杲之

錦節銜天使瓊仙駕羽君投金翠山曲莫壁清江濱圓
洞開丹鼎方壇聚絳雲資貺幽難識空歌迥易分

早度分水嶺

千年遊蜀道萬里向長安徒費周王粟空彈漢吏冠馬
蹄穿欲盡貂裘故轉寒曾冰橫九折積石凌七盤重谿
既下軟峻峯亦上干隴頭聞戍鼓嶺外咽飛湍瑟瑟松
風急蒼蒼山月團傳語後來者斯路誠獨難

入秦川界

隴阪長無極蒼山望不窮石徑縈疑斷回流映似空花
開綠野霧鶯轉紫巖風春芳勿遽盡留賞故人同

夜飲東亭

宋延清

春水鳴大壑皓月吐層岑岑壑景色佳慰我遠遊心聞
芳足幽氣驚棲多衆音高興南山曲長謠橫素琴

敬答田徵君

家臨清溪水溪水繞盤石綠蘿四面垂裏裏百餘尺風
泉度絲管苔蘚鋪茵席傳聞潁陽人霞外漱靈液忽枉
巖中翰吟卧朝復夕何當遂遠遊物色候逋客

初至崖口

崖口衆山斷欽峯聳天壁氣衡落日紅影入春潭碧錦
績織苔蘚丹青畫松石水禽泛容與巖花飛的皪微路
從此深我來限于役惆悵情素已群峯黯將夕

題老張松樹

歲晚東巖下周顧何悽惻日落西山陰衆草起寒色中
有喬松樹使我長歎息百尺無寸枝一生自孤直

感遇十首

陳伯玉

微月生西海幽陽始化昇圓光正東滿陰魄已朝疑太
極生天地三元更廢興至精諒斯在三五誰能徵
市人矜巧智於道若童蒙傾奪相夸侈不知身所終曷
見玄冥子觀世玉壺中窈然遺天地乘化入無窮
玄天幽且嘿群議曷嗤嗤聖人教猶在世運久陵遲一
繩將何繫憂醉不能持去去行采芝勿爲塵所欺
蘭若自春夏茅蔚何青青幽獨空林色朱蕤冒紫莖遲
遲白日晚嫋嫋秋風生歲華盡搖落芳意竟何成
翡翠巢南海雌雄珠樹林何知美人意驕愛比黃金殺

身炎洲裏委羽玉堂陰旖旎光首飾歲蕤爛錦衾豈不
在遐遠虞羅忽見尋多林信爲累歎息此珍禽

玄蟬號白露茲歲忽蹉跎群物從大化孤英將奈何瑤
臺有青鳥遠食玉山禾崑崙見玄鳳豈復憂虞羅

吾愛鬼谷子青谿無垢氛囊括經世道遺身在白雲七
雄方龍鬪天下久無君浮雲不足貴遵養晦時文舒可

彌六合卷之不盈分豈同山木壽空與麋鹿群

竭來豪游子勢利禍之門如何蘭膏歎感激自先冤衆
趨明所避時棄道猶存雲泉旣已失羅網與誰論箕山
有高節湘水有清源唯應白鷗鳥可爲洗心言

樂羊爲魏將食子殉軍功骨肉且相薄他人安得忠吾
聞中山相乃厲放麀翁孤獸猶不忍况以奉君終

昔日章華宴荆王樂荒淫霓旌翠羽蓋射兕雲夢林竭

來高堂觀帳望陽雲岑雄圖今若此黃雀空哀吟

訓暉上人夏日林泉見贈

聞道白雲居窈窕青蓮宇巖泉萬丈流樹石千年古林
卧對軒窗山陰滿庭戶方釋塵中事從君襲蘭杜

贈荅弘農青巖曲有盤石可坐宋十一每拂拭

待余寄詩贈之云 田遊巖隱太白山召拜
崇文館學士

信彼稱靈石居然狎道棲徘徊承翠巘賦駁帶深溪夕
陰起層岫清景半虹蜺風來應嘯阮波渡可琴絃僕之
穎陽客望彼空思齊倘見山人至簪蒿且杖藜

秋日還京陝西十里

薛嗣通

驅車越陝郊北顧臨大河隔河見鄉邑秋風水增波西
登咸陽途日暮憂思多傳巖既鬱紆首山亦嵯峩操築
無昔老采薇有遺歌客遊既迴換人生知幾何

雜詩二首

抱薰心恒焦舉旆心恒搖天長地自久歡樂能幾朝君
看西陵樹歌舞為誰嬌

問子青霞意何事留朱軒自言心遠俗未始迹辭喧遇
蒙良時幸側息吏途煩簪纓非宿好文史棄前言夕卧
北窓下夢歸南山園白雲漸幽谷清風媿泉源十年茲
賞廢佳期今復存挂冠謝朝侶星駕別君門

石門墨山二山相連有禪堂道觀天下絕境

張道濟

菌輪江上山近在華容縣常陟巴丘首天晴遙可見佳
遊屢前諾芳月愆幽眷及此符守移歡言臨道使既攜
賞心客復有送行掾竹徑入陰宵松崖上空藉草共林
一色雲與峯萬變探窺石門斷綠越沙澗轉兩山勢爭

雄峯巘相顧眇樂妙靈仙寶境華巖壑選清都西淵絕
金地東敞宴池果接園畦風煙邇臺殿高尋去石頂曠
覽天宇徧千山紛滿目百川豁對面綺來雲氣迎人去
鳥聲戀長揖桃源士舉世同企羨

宋侯鳴臯夢趙六予未及報而陳子云亡今追
為此詩答宋主簿廉貽平昔遊舊 盧子潛名

用幽州人
中書舍人

暮川罕停波朝雲無留色故人琴與詩可存不可識
識心尚可親琴詩非故人鳴臯初夢趙蜀國已悲陳感化
傷淪滅魂交昔未申冥期失幽報茲理復今晨前嗟成
後泣已矣將何及舊感與新悲虛懷疇昔時趙侯鴻寶
氣獨負青雲姿群有含妙識眾象懸清機雄談盡物變
精義解人頤在陰旣獨善幽躍自為疑宛彼千里足傷

哉一尉欺陳生富清理卓犖兼文史思縟巫山雲調逸
岷江水鏗鏘哀忠義感激懷知己負劍登薊門孤遊入
燕市浩歌去京國歸守西山趾幽居探元化立言見千
祀埋沒經濟情良圖竟云已坐憶平生遊十載懷高立
題書滿古壁採藥遍巖幽子微化金鼎僊笙不可求榮
哉宋與陸名宦羨中州在亡一睽阻岐路方悠悠自余
事山海及茲人世改傳聞當世榮皆是古人名無復平
原賦空餘鄰笛聲泣對西州使悲訪北邙塋新墳蔓宿
草舊闕毀殘銘為君成此曲因言寄友生默語無窮事
凋傷共此情

同前和登會稽山 孫逖博州武水人
中書舍人

嵇山碧湖上勢入東溟盡煙景晝清明九峯爭隱嶙望
中馱朱紱俗內探玄牝野老聽鳴騶山童擁行軫仙花

寒未落古蔓柔堪引竹澗入霜多松崖向天近雲從海
人去日就江村隕能賦立嘗聞和歌參不敏冥搜信冲
漠多士期標準願奉濯纓心長謠反招隱

感遇詩二首

張子壽

魚游樂深池鳥棲擇高枝嗟爾蜉蝣羽翯翯亦何爲有
生豈不化所感奚若斯神理日微滅吾心安得知浩蕩
揚朱子徒然泣路岐

漢上有游女求思安可得袖中一札書欲寄雙飛翼冥
冥獨不見耿耿徒絨憶紫蘭秀空蹊皓露奪幽色馨香
歲欲晚感歎情何極白雲在南山日暮長大息

登南嶽事畢謁司馬道士

將命祈靈嶽迴策詣真士絕迹尋一造異香聞數里分
庭八桂樹肅容兩童子入室希把面登牀願啓齒誘我

棄智詠迨茲長生理吸精反自然鍊藥求不死斯言眇
霄漢顧予嬰紛滓相去九牛毛慙歎荷知己

藍田山石門精舍

王摩詰

落日山水好漾舟信歸風玩竒不覺遠因以緣源窮遙
愛雲木秀初疑路不同安知清流轉偶與前山通捨舟
理輕策果然愜所適老僧四五人逍遙蔭松柏朝梵林
未曙夜禪山更寂道心及牧童世事問樵客瞑宿長林
下焚香卧瑤席澗芳襲人衣山月映石壁再尋畏迷誤
明發更登歷笑謝桃源人花紅復來覲

贈房盧氏琯

達人無不可忘已愛蒼生豈復小千室絃歌在兩楹浮
人日已歸但坐事農耕桑榆鬱相望邑里多雞鳴秋山
一何淨蒼翠臨寒城視事兼偃卧對書不簪纓蕭條人

吏散鳥雀下空庭鄙夫心所向晚節異平生將從海嶽
居守靜解天刑或可累安邑茅茨君試營

贈祖三詠

蟪蛄掛虛牖蟋蟀鳴前除歲晏涼風至君子復何如高
館閨無人離居不可道閉門寂已閉落日照秋草雖有
近音信千里阻河關中復客汝穎去年歸舊山結交二
十載不得一日展貧病子既深契闊余不淺仲秋雖未
歸莫秋以為期良會詎幾日中自長相思

戲贈張五弟諲

吾弟東山時心尚亦何遠日高猶自卧鍾動始能飯頭
上髮未梳床頭書不卷清川興悠悠空林對偃蹇青苔
石上淨細草松下軟窻外鳥聲閑階前虎心善徒然萬
慮多澹爾大虛緬一知與物平自顧為人淺對君忽自

得浮念不煩遣

休暇還舊業便使

謝病始告歸依依入桑梓家人皆佇立相候柴門裏時
輩皆長年成人舊童子上堂家慶畢願與姻親齒論舊
忽餘悲目存且相喜田園轉蕪沒但有寒泉水衰柳日
蕭條秋光清色里入門乍如昨休騎非便止中飯顧王
程離憂從此始

宿鄭州

朝與周人辭莫投鄭人宿他鄉絕儔侶孤客親僮僕宛
洛望不見秋霖晦平陸田父草際歸村童雨中牧主人
東臯上時稼繞茅屋蟲思機杼鳴雀喧禾黍熟明當渡
京水昨晚猶金谷此去欲何言窮邊徇微祿

觀別者

青青楊柳陌陌上別離人愛子游燕趙高堂有老親不
行無可養行去百憂新切切委兄弟依依向四鄰都門
帳飲畢從此謝賓親揮淚逐行侶含悽動征輪車從望
不見時時起行塵余亦辭家者看之淚滿巾

送別

聖代無隱者英靈盡來歸遂令東山客不得顧采薇既
至君門遠孰云吾道非江淮度寒食京洛縫春衣置酒
臨長道同心與我違行當浮桂棹未幾拂荆扉遠樹帶
行客孤城當落暉吾謀適不用勿謂知音稀

冬日遊覽

步出城東門試騁千里目青山橫蒼林赤日團平陸渭
北走邯鄲關東出函谷秦地萬方會來朝九州牧雞鳴
咸陽市冠蓋相追逐丞相過列侯群公餞光祿相如方

老病獨歸茂陵宿

崔濮陽兄季重前山興

秋色有佳興况君池上閑悠悠西林下自識門前山千
里橫黛色數峯出雲閒嵯峩對秦國合沓藏荆關殘雨
斜日照夕嵐飛鳥還故人今尚爾歎息此顏顏

過李楫宅

閑門秋草色終日無車馬客來深巷中犬吠寒籬下散
髮時未簪道書行尚把與我同心人樂道安貧者一罷
宜城酌還歸洛陽社

渭水田家

斜光照墟落窮巷牛羊歸野老念僮僕倚杖候荆扉雉
雉麥苗秀蠶眠桑葉稀田夫荷鋤立相見語依依即此
羨閑逸悵然歌式微

春中田家作

屋上春鳩鳴村邊杏花白持斧伐遠揚荷鋤覘泉脉新
燕識舊巢舊人看新曆臨觴忽不御惆悵遠行客

齊州送祖三

相逢方一笑相送還成泣祖帳已傷離荒城復愁入天
寒遠山淨日暮長河急解纜君已遙望君猶佇立

贈劉藍田

籬中犬迎吠出屋候柴扉歲晏輸并稅山村人夜歸晚
田始家食餘布成我衣詎肯無公事煩君問是非

歎白髮

我年亦何長髮髮日已白俛仰天地閒能為幾時客惆
悵故山雲併徊空日夕何事與時人東城復南陌

李陵詠

漢家李將軍三代將門子結髮有奇策少年成壯士長
驅塞門兒深入單于壘旌旗列相向簫鼓悲何已日暮
沙漠垂戰聲煙塵裏將令驕虜滅豈獨名王侍既夫大
軍援遂嬰穹廬恥少小蒙漢恩何堪坐思此深衷欲有
報投軀未能死引領望子卿非君誰相理

西施詠

艷色天下重西施寧久微朝為越溪女暮作吳宮妃幾
日豈殊眾貴來方悟稀邀人傳脂粉不自著羅衣君寵
益嬌態君憐無是非當時浣紗伴莫得同車歸持謝鄰
家女効顰安可希

羽林騎閨人

秋日臨高城城中管絃思離人堂上愁稚子階前戲出
門復映戶望望青絲騎行人過欲盡狂夫終不至左右

寂無言相看共垂淚

歸沛縣道中晚泊留侯城

劉文房

訪古此城下子房安在哉白雲去不返危堞空崔嵬
昔楚漢時頗聞經濟才運籌風塵下能使天地開
蔓草日已積長松日已摧功名滿青史祠廟唯蒼苔
百里暮程遠孤舟川上迴進帆東風便轉岸前山來
楚洲澹相引沙鷗閑不猜扣舷從此去延首仍徘徊

龍門八詠

關口

秋山向搖落秋水急波瀾獨見魚龍氣長令煙雨寒
誰窮造化力空向兩崖看

水西渡

伊水搖鏡光纖鱗如不隔千龕道旁古一鳥沙上白
何

事還山雲能留向城客

水東渡

山葉傍崖赤千峯秋色多夜泉發清響寒渚生微波
稍見沙月上歸人爭渡河

福公塔

寂寞對伊水經行長未還東流自朝暮千載空雲山
誰見白鷗鳥無心洲渚閒

遠公龕

松路向精舍花龕歸老僧閑雲揚錫杖落日低金繩
入夜翠微裏千峯明一燈

石樓

隱隱見花閣隔河映青林水田秋鴈下山寺夜鐘深
寂寞群動息風泉清道心

渡水

日暮下山來千山暮鍾發不如波上棹還弄山中月伊
水連白雲東南遠明滅

下山

誰識往來意孤雲長自閑風寒未渡水日暮更看山木
落眾峯白龍宮蒼翠閒

王處士草堂壁畫衡霍諸山

愛此衡霍近卷簾如可攀能令堂上客見盡湘南山青
翠千萬狀飛來方丈閒歸雲無處滅去鳥何時還勝事
日相對主人常獨閑清陰滿四壁佳氣生重關頗與宿
心會看看慰愁顏

時興

楊賁

貴人昔未貴咸願顧寒微及自登樞要何曾問布衣平

明登紫閣日晏下彤闈擾擾路傍子無勞歌是非

宋中二首

高逵夫

梁王昔全盛賓客復多才悠悠一千年陳迹惟高臺寂
寞向秋草悲風千里來

梁苑白日暮梁山秋草時君王不可見脩竹令人悲九
月桑葉盡寒風鳴樹枝

贈王威古

崔顥

三十羽林將出身常事邊春風吹淺草獵騎何翩翩插
羽兩相顧鳴弓新上弦射麋入深谷飲馬投荒泉馬上
共傾酒野中聊割鮮相看未及飲雜虜寇幽燕烽火去
不息胡山高際天長驅掠東北戰解城亦全報國行赴
難古來皆共然

贈輕車

悠悠遠行婦經春涉長道幽冀桑始青洛陽蠶欲老憶
昨戎馬地別時心草草烽火從北來邊城閉常早平生
少相遇未得展懷抱今日杯酒閒見君交情好

遼西

燕郊芳歲晚殘雪凍邊城四月青草合遼陽春水生胡
人正牧馬漢將日徵兵露重寶刀濕沙虛金鼓鳴寒衣
著已盡春服誰為成寄語洛陽使為傳邊塞情

古遊俠呈軍中諸將

少年負膽氣好勇復知機杖劍出門去孤城逢合圍殺
人遼水上走馬漁陽歸錯落金鎖甲蒙茸貂鼠衣還家
且行獵弓矢速如飛地迴鷹犬疾草深狐兔肥腰閒帶
兩綬轉眄生光輝顧謂今日戰何如隨建威

宋少府東谿泛舟

李頎

東川人
新錄尉

登岸還入舟水禽驚笑語晚葉低眾色濕雲帶殘暑落
日乘醉歸谿流復幾許

梨公院各賦一物得初荷

微風和眾草大葉長圓陰晴露珠垂合夕陽花影深從
來不著水清淨本因心

送暨道士還玉清

仙官有名籍度世吳江濱大道本無我青春長與君中
州俄已到至理得而聞明王降黃屋時人看白雲空山
何窈窕三秀日氛氲遂此留書客超遙煙駕分

效古二首

儲光羲

魯人監察御史

晨登涼風臺莫走邯鄲道矚靈何赫烈四野無青草大
軍北集燕天子西居鎬婦人役州縣丁男事征討老幼
相別離哭泣無昏早稼穡既殊絕川澤復枯槁曠哉遠

此憂冥冥南山皓

東風吹大河河水如倒流河洲塵沙起有若黃雲浮
頰霞燒廣澤洪曜赫高丘野老泣相語無地可蔭休翰林
有客卿獨負蒼生憂中夜起躑躅思欲獻厥謀君門峻
且深跼足空夷猶

雜詩

坏渾本無象末路多是非達士志寥廓所在能忘機耕
鑿時未至還山聊采薇虎豹對我蹲鸞鷲傍我飛仙人
空中來謂我勿復歸格澤爲君駕虹蜺爲君衣西遊崑
崙墟可與世人違

田家雜興八首

春至倉庚鳴薄言向田野不能自力作黽勉取鄰女既
念生子孫方思廣田圃閒時相顧笑喜悅好禾黍夜夜

登嘯臺南望洞庭渚百草被霜露秋山響砧杵却羨故
年時中情無所取

衆人恥貧賤相與尚膏腴我情既浩蕩所樂在畋漁山
澤時晦暝歸家暫閑居滿園種葵藿繞屋樹桑榆禽雀
知我閒翔集依我廬所願在優游州縣莫相呼日與南
山老兀然傾一壺

逍遙阡陌上遠近無相識落日照秋山千巖同一色網
罟繞深莽鷹鷂始輕翼獵馬旣如風奔獸莫敢息駐旗
倉海上犒士具宮側楚國有夫人性情本真直鮮禽徒
自羨終歲竟不食

梧桐蔭我門薜荔網我屋超超兩夫婦朝出暮還宿稼
穡旣自種牛羊還自牧日旰懶耕鋤登高望川陸空山
足禽獸墟落多喬木白馬誰家兒翩翩相馳逐

楚山有高士梁國有遺老築室既相鄰同田復同道糗
糲常共飯兒孫每更抱忘此耕耨勞愧彼風雨好蟋蟀
鳴空澤鷓鴣傷秋草日夕寒風來衣裳苦不早

貧士養情性不復知憂樂去家行賣畚留滯南陽郭秋
至黍苗黃無人可刈穫孺子朝未飯把竿逐鳥雀忽見
梁將軍乘車出宛洛意氣軼道路光輝滿墟落安知負
薪者啞啞笑輕薄

種桑百餘樹種黍三十畝衣食既有餘時時會賓友夏
來菰米飯秋至菊花酒孺人喜逢迎稚子解趨走日暮
閑園裏團團蔭榆柳酩酊乘夜歸涼風吹戶牖清淺望
河漢低昂看北斗數甕猶未開明朝能飲否

田家趨隴畝當晝掩虛關鄰里無煙火兒童共幽閑桔
槔懸空圃雞犬滿桑閒時來農事隙采藥遊名山但念

所采多不言路險艱人生如蜉蝣一往不可攀君看西
王母千載美容顏

田家即事

蒲葉日已長荇花日已滋老農要看此貴不違天時迎
晨起飯牛雙駕耕東菑蚯蚓土中出田鳥隨我飛群合
亂啄噪嗷嗷如道飢我心多惻隱顧此兩傷悲撥食與
田鳥日暮空筐歸親戚更相謂我心終不移

使過彈箏峽作

鳥雀知天雪群飛復群鳴原田無遺粟日暮滿空城達
士憂世務鄙夫念王程晨過彈箏峽馬足凌兢行雙壁
隱靈曜莫能知晦明皚皚堅冰白漫漫陰雲平始信古
人言苦節不可貞

過新豐道中

西下長樂坂東入新豐道雨多車馬稀道上生秋草大
陰閱臯陸不知晚與早雷雲杳冥冥川谷漫浩浩詔書
植嘉木衆言桃李好自愧無此容歸從漢陰老

喫茗粥作

當晝暑氣盛鳥雀靜不飛念君高梧陰復解山中衣數
片遠雲度曾不蔽炎暉淹留膳茶粥共我飯蕨薇敞廬
既不遠日暮徐徐歸

釣魚灣

垂釣淥灣春春深杏花亂潭清疑水淺荷動知魚散日
暮待情人維舟綠楊岸

題太玄觀

門外車馬喧門裏宮殿清行即翳若木坐即吹玉笙所
喧既非我真道其冥冥

述華清宮

上林神君言此地即明庭山開鴻濛色天轉招搖星三
雪報大有孰謂非我靈

幽居

幽人下山徑去去夾青林滑處莓苔濕暗中蘿薜深春
朝煙雨散猶帶浮雲陰

仰答韋司業垂訪五首

蕭茂挺

叨叨食苹鹿常飲清冷川但悅豐草羨寧知牢饌鮮主
人有幽意將以充林泉罟網幸免傷蒙君復羈牽高堂
列衆賓廣坐鳴清絃俯仰轉驚惕徘徊獨憂煎緬懷雲
巖路欲往無由緣物各有所好違之傷自然
神龜在南國緬邈湘川陰遊止蓮葉上歲時嘉樹林毒
虫且不近斤斧何由尋錯落負竒文熒煌耀丹金山

萬里餘淮海阻且深獨保貞素質不為寒暑侵一逢盛
明代應見通靈心

晉代有儒臣當年富辭藻立言寄青史將以贊王道遼
落細歲時辛勤歷江島且言風波倦探涉豈為寶不遇
庾征西云誰展懷抱士貧乏知己安得成所好
彭陽昔游說願謁南郢都王果尚未達况從夷節謨豈
知晉叔譽無罪嬰囚拘臨難俟解紛獨知祁大夫舉辭
且不棄何必論親疎夫子覺者也其能遺我乎
關西一公子年貌獨青春被褐來上京翳然聲未振中
郎何為者倒屣驚座賓詞賦豈不佳盛名亦相因為君
奏此曲此曲多苦辛千載不可誣孰言今無人

山下晚晴

崔曙

開元進士

寥寥遠天淨谿路何空濛斜光照疎雨秋氣生白虹雲

盡山色暝蕭條西北風故林歸宿處一葉下梧桐

古意

綠筍總成行紅花亦成子能當此時好獨自幽閨裡夜
夜苦更長愁來劇如死

送王大昌齡赴江寧

岑參

文本之後南陽人嘉州刺史

對酒寂不語悵然悲送君明時未得用白首徒攻文澤
國從一官倉波幾千里群公滿天闕獨去過淮水舊家
富春渚嘗憶卧江樓自聞君欲行頻望南徐州窮巷獨
閉門寒燈靜深屋北風吹微雪抱被肯同宿君行到京
口正是桃花時舟中饒孤興湖上多新詩潜虬且深蟠
黃鶴飛來晚惜君青雲器努力加餐飯

北庭貽宗學士道別

萬事不可料歎君在軍中讀書破萬卷何事來從戎曾

逐李輕車西征出太蒙荷戈月窟外擐甲崑崙東兩度
皆破胡朝廷輕戰功十年祇一命萬里如飄蓬容鬢老
胡塵衣裘脆邊風忽來輪臺下相見披心曾飲酒對春
草彈碁聞夜鐘今且還龜茲臂上懸角弓平沙向旅館
匹馬隨飛鴻孤城倚大磧海氣迎邊空四月猶自寒天
山雪濛濛君有賢主將何謂泣途窮時來整六翮一舉
凌蒼穹

號州郡齋南池幽興閣二侍御道別

池色淨天碧水涼雨淒淒快風從東南荷葉翻向西性
本愛魚鳥未能返巖溪中歲徇微官遂令心賞睽及茲
佐山郡不異尋幽棲小吏趨竹逕訟庭侵藥畦胡塵暗
河洛二陝震鼓鼙故人佐戎軒逸翮凌雲霓行軍在函
谷兩度聞鶯啼相看紅旗下飲酒白日低聞君欲朝天

駟馬臨道嘶仰望浮與沈忽如雲與泥夜眠驛樓月曉
發關城雞惆悵西郊暮鄉書對君題

送李翥遊江外

相識應十載見君只一官家貧祿尚薄霜降衣仍單惆
悵秋草死蕭條芳歲闌且尋滄洲路遙指吳雲端匹馬
關塞遠孤舟江海寬夜眠楚煙濕曉飯湖山寒砧淨紅
鱠落袖香朱橘團帆前見禹廟枕底聞嚴灘便護賞心
趣豈歌行路難青門須醉別少為解征鞍

送張秘書充劉相公通汴河判官便赴江外觀省

前年見君時見君正泥蟠去年見君處見君已風搏朝
趨赤墀前高視青雲端新登麒麟閣適脫獬豸冠劉公
領舟楫汴水揚波瀾萬里江海通九州天地寬昨夜動

使星今日送征鞍老親在吳郡令弟雙同官鱸膾剩堪
憶尊羹殊可餐既參幕中畫復展膝下驩因送故人行
試歌行路難何處路最難最難在長安長安多權貴珂
珮聲珊珊儒生直如弦權貴不須干斗酒取一醉孤瑟
爲君彈臨歧欲有贈持以握中蘭

號州送鄭興宗弟歸扶風別廬

佐郡已三載豈能長後時出關少親友賴汝常相隨今
且忽言別愴然俱淚垂半生滄洲意獨有青山知州縣
不敢說雲霄誰敢期因懷陳溪老最憶南峯緇我爲多
種藥還山應未遲

青山峽口泊舟懷狄侍御

峽口秋水壯沙邊且停橈奔濤振石壁峯勢如動搖九
月蘆花新彌令客心焦誰念在江島故人滿天朝無處

豁心曾憂來醉能銷往來巴山道三見秋草彫狄生新
相知才調凌雲霄賦詩折造化入幕生風颭把筆判甲
兵戰士不敢驕皆云梁公後遇鼎還能調一別倏經時
音塵殊寂寥何當見夫子不嘆鄉關遙

潼關使院懷王七季友

王生今才人時輩咸所仰何當見顏色終日勞夢想驅
車到關下欲往阻河廣滿目徒春華思君罷心賞開門
見太華朝日映高掌忽覺蓮花峯別來更如長無心顧
微祿有意在獨往不負林中期終當出塵網

郊行寄杜位

嶮嶭空城煙淒清寒山景秋風引歸夢昨夜到汝穎近
寺聞鐘聲映陂見樹影所思何由見東北徒引領

號中訓陝西甄判官贈

微才棄散地拙宦慙清時白髮徒自負青雲難可期胡
塵暗東洛亞相方出師分陝振鼓鼙二嶠滿旌旗夫子
廊廟器迥然青冥姿閫外佐戎律幕中吐兵竒前者驛
使來忽枉行軍詩晝吟庭花落夜諷山月移昔君隱蘇
門浪迹不可羈詔書自徵用今譽天下知別來春草長
東望轉相思寂寞山城暮空聞畫角悲

使交河郡

奉使按胡俗平明發輪臺暮投交河城火山赤崔嵬九
月尚流汗炎風吹沙埃何事陰陽工不遣雨雪來吾君
方憂邊分閫資大才昨者新破胡安西兵馬回鐵關控
天崖萬里何遼哉煙塵不敢飛白草空皚皚軍中日無
事醉舞傾金罍漢代李將軍微功今可哈

南池夜宿思王屋青蘿舊齋

池上卧煩暑不擲復不巾有時清風來自謂羲皇人天
晴雲歸盡雨洗月色新公事常不閑道書日生塵年年
家王屋五別青蘿春安得還舊山東溪垂釣綸

題華嚴寺環公禪房

寺南幾十峯峯翠晴可掬朝從老僧飯昨日崖口宿錫
杖倚枯松繩床映深竹東溪草堂路來往行自熟生事
在雲山誰能復羈束

終南兩峯草堂

歛迹歸山田息心謝時輩晝還草堂卧但見雙峯對興
來資佳遊事愜符勝槩著書高窓下日夕見城內曩爲
世人誤遂負平生愛久與林壑辭及來杉松大偶茲精
廬近數預名僧會有時逐樵漁盡日不冠帶崖口上新
月石門破蒼靄色向群木深光搖一潭碎緬懷鄭生谷

頗憶嚴子瀨勝事猶可追斯人邈千載

林卧

偶得魚鳥趣復茲水木涼遠峯帶雨色落日搖川光
白中西山藥袖裡淮南方唯愛隱几時獨遊無何鄉

萬里橋

成都與維陽相去萬里地滄江東流疾帆去如鳥翅楚
客過此橋東看盡垂淚

嚴君平卜肆

君平曾賣卜卜肆蕪已久至今杖頭錢時時地上有不
知支機石還在人間否

題鐵門關樓

鐵門天西涯極目少行客關門一小吏終日對石壁橋
跨千仞危路盤兩崖窄試登西樓望一望頭欲白

宿太白東溪李老舍寄弟姪

渭上秋雨過北風正騷騷天晴諸山出太白峯最高主
人東谿老兩耳生長毫遠近知百歲子孫皆二毛中庭
井欄上一架獼猴桃石泉飯香杭酒甕開新糟愛茲田
中趣始悟世上勞我行有勝事書此寄爾曹

石上藤

石上生孤藤弱蔓依石長不逢高枝引未得凌空上何
處堪託身為君長萬丈

雜詩三首

李遐叔

黃鍾叩元音律呂更循環邪氣悖正聲鄭衛生其閒典
樂忽消微波浪與天渾嘈嘈鴟梟動好鳥徒繇蠻王吉
歸鄉里甘心長閉關

陰魄淪宇宙太陽假其明臣道不敢專由此見虧盈未

聞東菑稼一氣嘉穀成上天降寒暑地利乃可生葛藟
附柔木繁陰蔽曾原風霜摧枝條不復庇本根女蘿依
松栢然後得長存

孔光尊董賢胡廣慚李固儒風冠天下而乃敗王度絳
侯與博陸忠朴受遺顧求名不考實文弊反為蠹

尋香山湛上人

孟浩然

字浩然襄陽人隱鹿門山

朝游訪名山山遠在空翠氛氲亘百里日入行始至谷
口聞鍾聲林端識香氣杖策尋故人解鞍暫停騎石門
殊豁險篁徑轉森邃法侶忻相逢清談曉不寐平生慕
真隱累日探多異野老朝入田山僧暮歸寺松泉多逸
響苔壁饒古意願言投此山身世兩相棄

發漢浦潭

東旭早光芒諸禽已驚聒卧聞漁浦口橈聲暗相撥日
出氣象分始知江路闊美人常晏起照影弄流沫飲水
畏驚猿祭魚時見獺舟行自無悶况值晴景豁

漢中漾舟

漾舟逗何處神女漢臯曲雪罷冰復開春潭千丈渌輕
舟恣往來探翫無厭足波影搖妓釵沙光逐人目傾盃
魚鳥醉穠句鶯花續良會難再逢日入須秉燭

龍泉精舍

亭午聞山鍾起行散愁寂尋林采芝去谷轉松蘿密旁
見精舍開長廊飯僧畢石渠流雪水金子曜霜橘竹房
思舊遊過憇終未日入洞窺石髓傍厓采蜂蜜日暝辭
遠公虎谿相送出

南亭懷辛子

山光忽西落池月漸東上散髮乘夕涼開軒卧閑敞荷

風送香氣竹露滴清響欲取鳴琴彈恨無知音賞感此
懷故人中宵勞夢想

宿葉師山房待丁公不至

夕陽度西嶺群壑倏已暝松月生夜涼風泉滿清聽
人歸欲盡煙鳥棲初定之子期宿來孤琴候蘿逕

耶谿泛舟

落景餘清暉輕棹弄溪渚澄明愛水物臨泛何容與
白首垂釣翁新妝浣紗女看看似相識脉脉不得語

聽鄭五惜琴

阮籍推名飲清風坐竹林半酣下衫袖拂拭龍唇琴
一盃彈一曲不覺夕陽沈余意在山水聞之諧夙心

萬山潭

垂釣坐磐石水清心亦閒魚行潭樹下猿卧島藤閒遊

女昔解珮傳聞於此山求之不可得泂月棹歌還

歲暮海上作

仲尼既已沒余亦浮于海昏見斗柄回方知歲星改虛
舟任所適垂釣非有待爲問乘槎人滄洲復何在

送從弟落第後歸會稽

疾風吹征帆倏爾向空沒千里去俄頃三江坐超忽向
來共懽娛日夕成楚越落羽更分飛誰能不驚骨

采樵作

采樵入深山山深水重疊橋崩卧槎擁路嶮乘藤接日
落伴將稀山風拂蘿衣長歌負輕策平野望煙歸

月下懷

秋風明月懸光彩露霑濕驚鵲棲未定飛螢卷簾入庭
窻寒影踈鄰杵夜深急佳期曠何許望望空佇立

晚泊潯陽望香鑪峯

挂席幾千里名山都未逢泊舟潯陽郭始見香鑪峯嘗
讀遠公傳永懷塵外蹤東林精舍近日暮坐聞鐘

峴潭作

石潭傍隈隩沙岸曉黃綠試垂竹竿釣果得槎頭鱖
人騁金錯纖手膾紅鮮因謝陸內史尊羹何足傳

大堤行樂寄萬七

大堤行樂處車馬相馳突歲歲春草生踏青二三月王
孫挾珠彈遊女矜羅襪携手今莫同江花為誰發

長門怨

齊洗心

名潯交州人中書侍郎

榮榮孤思逼寂寂長門夜妾妬亦知非君恩那不惜攜
琴就玉階調悲聲未諧將心託明月流影入君懷

古別離

孟雲卿

平陽人校書郎

朝日上高臺離人怨秋草但見萬里天不見萬里道君
行本遙遠苦樂良難保宿昔夢同衾憂心夢傾倒含酸
欲誰訴展轉傷懷抱結髮年已遲征行去何早寒暄有
時謝顛顛難再好人皆壽年壽死者何曾老少壯無會
期水深風浩浩

仙谷遇毛女意知是秦宮人

常建

開元進士

谿口水石淺冷冷明藥蕞入谿雙峯峻松栝梳幽風垂
嶺枝嫋嫋翳泉花濛濛黃綠霽人目路盡心彌通磐石
橫陽厓前臨殊未窮回潭清雲影瀰漫長天空水邊一
神女千歲為玉童羽毛經漢代珠翠逃秦宮日覲神已
寓鶴飛言未終祈君青雲秘願謁黃仙翁嘗以耕玉田
龍鳴西頂中金梯與天接幾日來相逢

夢太白峯

夢寐昇九厓杳靄逢元君遺我太白峯寥寥辭垢氛結
宇在星漢宴林閉氤氳簪楹覆餘翠巾鳥生片雲時往
谿水閒孤亭晝仍曛松峯引天影石瀨清霞文恬日緩
舟趣霽心投鳥群春風又搖擢潭島花紛紛

送楚十少府

微風吹霜氣寒影明前除落日未能別蕭蕭林木虛愁
煙闕千里仙尉其何如因送別鶴操贈之雙鯉魚鯉魚
在金盤別鶴哀有餘心事則如此請君開素書

弔王將軍墓

嫖姚北伐時深入強千里戰餘落日黃軍敗鼓聲死嘗
聞漢飛將可奪單于壘今與山鬼鄰殘兵哭遼水

送陸擢

聖代多才俊陸生何考槃南山高松樹不合空摧殘九

月湖上別北風秋雨寒殷勤歎孤鳳早食金琅玕

江上琴興

江上調玉琴一絃清一心冷冷七絃遍萬木澄幽陰能
使江月白又令江水深始知梧桐枝可以徽黃金

送李十一尉臨谿

冷冷花下琴君唱渡江吟天際一帆影豫懸離別心以
言神僊尉因致瑤華音回軫拊商調越谿澄碧林

宿王昌齡隱居

清谿深不測隱處惟孤雲松際露微月清光猶爲君茅
亭空葺影藥院滋苔紋余亦謝時去西山鸞鶴群

鄉賦後自鞏還田家因謝鄰友見過之作 盧

緯卿 名象

雞鳴出東邑馬倦登南巒落日見桑柘翳然丘中寒鄰

家多舊識投暝來相看且問春稅苦兼陳行路難園場
近陰壑草木易凋殘峯暗雪猶積澗深冰已團浮名知
何用歲晏不成懽置酒共君飲當歌聊自寬

暮秋陽子江寄孟浩然

劉昫虛 江東人

木葉紛紛下東南日煙霜林山相晚暮天海空青蒼暝
色空復久秋聲亦何長孤舟兼微月獨夜仍越鄉寒笛
對京口故人在襄陽詠思勞今夕漢江遙相望

齋心

王少伯

女蘿覆石壁溪水幽濛瀟紫葛蔓黃花娟娟寒露中朝
飲花上露夜卧松下風雲英化為水光彩與我同日月
蕩精魂寥寥天府空

秋山寄陳讜言

巖閒寒事早眾山木已黃北風何蕭蕭茲夕露為霜感

激不能寐中宵時慨慷黃蟲初悲鳴玄鳥去我梁獨卧
時易晚離群情更傷思君若不及鴻鴈今南翔

海上寄蕭五

朔風剪塞草寒露日夜結行行屆瀛壖歸思生暮節驛
樓見萬里延首望遼碣遠海入大荒平蕪際窮髮舊國
在夢想故人且胡越契闊阻風期荏苒成雨別海西望
京口兩地各天末索居動經秋載笑知曷月日窮南望
盡唯見飛鳥滅音塵未易得何以慰飢渴

過華陰

雲起太華山雲山互明滅東峯始含景了了見松雪羈
人感幽棲宵映轉奇絕欣然忘所疲未望吟不輟信宿
百餘里出關玩新月何意昨暝暝遇物遂遷別人生屢
如此何以肆愉悅

宿裴氏山莊

蒼蒼竹林暮吾亦知所投靜坐山齋月清谿聞遠流西
峯下微雨向晚白雲收遂解塵中組終南春可遊

聽彈風入松贈楊補闕

商風入我絃夜竹深有露絃悲與林寂清景不可度寥
落幽居心颯颯青松樹松風吹草白谿水寒日暮聲意
去復還九變待一顧空山多雨雪獨立君始悟

過賈六

蘇晉 知制誥

主人病且閑客來情彌適一酌復一笑不知日將夕昨
來屬歡遊於今盡成昔努力持所趣空名定何益

古風十七首

李太白

大雅久不作吾衰竟誰陳王風委蔓草戰國多荆榛龍
虎相啖食兵戈遠狂秦正聲何微茫哀怨起騷人揚馬

激頽波開流蕩無垠廢興雖萬變憲章亦已淪自從建
安來綺麗不足珍聖代復元古垂衣貴清真群才屬休
明承運共躍鱗文質相炳煥眾星羅秋旻我志在刪述
垂輝映千春希聖如有立絕筆於獲麟

蟾蜍薄太清蝕此瑤臺月圓光虧中天金魄遂淪沒蟬
竦入紫微大明夷朝暉浮雲限兩曜萬象昏陰霏蕭蕭
長門宮昔是今已非桂蠹花不實天霜下嚴威沈歎終
未夕感我涕霑衣

代馬不思越越禽不戀燕情性有所習風土固其然昔
別鴈門關今戍龍庭前驚沙亂海日飛雪迷胡天蟣蝨
生虎鴟心魂逐旌旆苦戰功不賞忠誠難可宣誰憐李
飛將白首沒三邊

羽檄如流星虎符合專城喧呼救邊急群鳥皆夜鳴白

日曜紫微三公運權衡天地皆得一澹然四海清借問
此何爲答言楚徵兵渡瀘及五月將赴雲南征怯卒非
戰士炎方難遠行長號別嚴親日月慘光晶泣盡繼以
血心摧兩無聲困獸當猛虎窮魚餌奔鯨千去不一回
投軀豈全生如何舞干戚一使有苗平

秦皇按寶劍赫怒震威神逐日巡海右驅石架滄津徵
卒空九寓作橋傷萬人但求蓬島藥豈思農扈春力盡
切不贍千載爲悲辛

殷后亂天紀楚懷亦已昏夷羊滿中野菘菘盈高門比
干諫而死屈平竄湘源虎口何婉孌女頽空嬋媛彭咸
又淪沒此意與誰論

咸陽二三月宮柳黃金枝綠幘誰家子賣珠輕薄兒日
暮醉酒歸白馬驕且馳意氣人所仰冶遊方及時子雲

不曉事晚獻長楊辭賦達身已老草玄纘若絲投閣良
可歎但爲此輩嗤

燕昭延郭隗遂築黃金臺劇辛方趙至鄒衍復齊來奈
何青雲士棄我如塵埃珠玉買歌笑糟糠養賢才方知
黃鶴舉千里獨徘徊

郢客吟白雪遺響飛青天徒勞歌此曲舉世誰爲傳試
爲巴人唱和者乃數千吞聲何足道歎息空淒然

越客採明珠提携出南隅清輝照海月美價傾皇都獻
君君按劍懷寶空長吁魚目復相哂寸心增煩紆

綠羅紛歲蕤繚繞松栢枝草木有所託歲寒尚不移奈
何天桃色坐嘆葑菲詩玉顏艷紅彩雲髮非素絲君子
恩已畢賤妾將何爲

世道日交喪澆風散淳源不采芳桂枝反棲惡木根所

以桃李樹吐花竟不言大運有興沒群動爭飛奔歸來
廣成子去入無窮門

鳳飢不啄粟所食唯琅玕焉能與群雞刺蹙爭一餐朝
鳴崑丘樹夕飲砥柱湍歸飛海路遠獨宿天霜寒幸遇
王子晉結交青雲端懷恩未得報感別空長歎
燕臣昔慟哭五月飛秋霜庶女號蒼天震風擊齊堂精
誠有所感造化爲悲傷而我竟何辜遠身金殿傍浮雲
蔽紫闥白日難回光群沙穢明珠衆草凌孤芳古來共
嘆息流淚空霑裳

青春流驚湍朱明驟回薄不忍看秋蓬飄揚竟何託光
風滅蘭蕙白露洒葵藿美人不我期草木日零落羽族
稟萬化小大各有依周周亦何辜六翮掩不揮願銜衆
禽翼一向黃河飛飛者莫我顧嘆息將安歸

莊周夢胡蝶胡蝶爲莊周一體更變化萬事良悠悠乃
知蓬萊水復作清淺流青門種瓜人舊日東陵侯富貴
固如此營營何所求
君平旣棄世世亦棄君平觀變窮太易探元化群生寂
寞綴道論空籬閉幽情騶虞不虛來鸞鷲有時鳴安知
天漢上白日懸高名海客去已久誰能測沈冥

四皓詩

白髮四老人昂藏南山側偃卧松雪閒冥翳不可識雲
窓拂青靄石壁橫翠色龍虎方戰爭於焉自休息秦人
夫金鏡漢祖昇紫極陰虹濁太陽前星遂淪匿一行佐
明聖欬起生羽翼切成身不居舒卷在胃臆宵冥合元
化茫昧信難測飛聲塞天衢萬古仰遺迹

月下獨酌

花下一壺酒獨酌無相親舉盃邀明月對影成三人月
既不解飲影徒隨我身暫伴月將影行樂須及春我歌
月徘徊我舞影凌亂醒時同交歡醉後各分散未結無
情遊相期邈雲漢

春日醉起言志

處世若大夢胡為勞其生所以終日醉頹然卧前楹覺
來眈庭前一鳥花閒鳴借問如何時春風語流鶯感之
欲歎息對酒還自傾浩歌待明月曲盡已忘情

蘇武

蘇武在匈奴十年持漢節白鴈上林飛空傳一書札牧
羊邊地苦落日歸心絕渴飲月窟水飢餐天上雪東還
沙塞遠北愴河梁別泣把李陵衣相看淚成血

王昭君

昭君拂玉鞍上馬啼紅頰今日漢宮人明朝胡地妾

子夜

長安一片月萬戶擣衣聲秋風吹不盡總是玉關情何
日平胡虜良人罷遠征

友人會宿

滌蕩千古愁留連百壺飲良宵宜且談皓月未能寢醉
來卧空山天地即衾枕

王右軍

右軍本清真瀟洒在風塵山陰遇羽客要此好鵝賓掃
素寫道經筆精妙入神書罷籠鵝去何曾別主人

對酒憶賀監二首

四明有狂客風流賀季真長安一相見呼我謫仙人昔
好盃中物今為松下塵金龜換酒處却憶淚沾巾

狂客歸四明山陰道士迎敕賜鏡湖水爲君臺沼榮人
亡餘故宅空有荷花生念此杳如夢淒然傷我情

送張舍人之江東

張翰江東去正值秋風時天晴一鴈遠海闊孤帆遲白
日行欲暮滄波杳難期吳洲如見月千里幸相思

戲贈鄭溧陽

陶今日日醉不知五柳春素琴本無絃漉酒用葛巾清
風北窓下自謂羲皇人何時到栗里一見平生親

嘲王歷陽不肯飲酒

地白風色寒雪片大如手笑殺陶淵明不飲盃中酒浪
撫一張琴虛栽五株柳空負頭上巾吾於爾何有

紫騮馬

紫騮行且嘶雙翻碧玉蹄臨行不肯渡似惜錦障泥白

雪關山遠黃雲海戍迷揮鞭萬里去安得念香閨

待酒不至

玉壺繫青絲沽酒來何遲山花向我笑正好銜盃時晚
酌東山下流鶯復在茲春風與醉客今日乃相宜

獨酌

天若不愛酒酒星不在天地若不愛酒地應無酒泉天
地既愛酒愛酒不愧天已聞清比聖復道濁如賢賢聖
既已飲何必求神仙三盃通大道一斗合自然但得醉
中趣勿謂醒者傳

春思

燕草如碧絲秦桑低綠枝當君懷歸日是妾斷腸時春
風不相識何事入羅帷

宣城青谿

清谿清我心水色異諸水借問新安江見底何如此人
行明鏡中鳥度屏風裏向曉猩猩啼空悲遠遊子

聽蜀僧濬彈琴

蜀僧抱綠綺西下峩峩峯為我一揮手如聽萬壑松客
心洗流水餘響入霜鍾不覺碧山暮秋雲暗幾重

金陵聽韓侍御吹笛

韓公吹玉笛侗儻流玉音風吹繞鍾山萬壑皆龍吟王
子停鳳管師襄掩瑤琴餘響渡江去天涯安可尋

望廬山瀑布泉

西登香爐峯南見瀑布水挂流三百丈噴壑數千里欬
如飛電來隱若白虹起初驚河漢落半洒雲天裏仰觀
勢轉雄壯哉造化功海風吹不斷江月照還空空空中亂
灑射左右洗青壁飛珠散輕霞流沫沸穹石而我遊名

山對之心益閑且諧宿所好永願辭人間

博平鄭太守自廬山千里相尋入江夏北市門

見訪却之武陵立馬贈別

大梁貴公子氣蓋蒼梧雲若無三千客誰道信陵君救
趙復存魏英威天下聞邯鄲能屈節博訪從毛薛夷門
得隱淪而與侯生親仍要鼓刀者乃是袖鎚人好士不
盡心何能保其身多君重然諾意氣遙相託五馬入市
門金鞍照城郭都忘虎竹貴且與荷衣樂去去桃花源
何時見歸軒相思終無極腸斷朗陵猿

安陸白兆山桃花巖寄劉侍御綰

雲卧三十年好閑復愛仙蓬壺雖冥絕鸞鶴心悠然歸
來桃花巖得憩雲窓眠對嶺人共語飲潭猿相連時昇
翠微上邈若羅浮巔兩岑抱東壑一嶂橫西天樹雜人

易隱崖傾月難圓芳草換野色飛蘿搖春煙入遠構石
室選幽開山田獨此林下意杳無區中緣未辭霜臺客
千載方來還

潯陽紫極宮感秋

何處聞秋聲蕭蕭北窓竹回薄萬古心攬之不盈掬靜
坐觀衆妙浩然媚幽獨白雲南山來就我蒼下宿懶從
唐生決蓋訪季主卜四十九年非一往不可復野情轉
蕭散世道有翻覆陶令歸去來田家酒應熟

姑孰溪

愛此溪水閑乘流興無極漾楫怕鷗鷺垂竿待魚食波
翻曉霞影岸疊春山色何處浣紗人紅顏未相識

玉華宮

杜子美

溪回松風長蒼鼠竄古瓦不知何王殿遺構絕壁下陰

房鬼火青壤道哀湍瀉萬籟真笙竽秋色正蕭洒羨人
爲黃土况乃粉黛假當時侍金輿故物獨石馬憂來藉
草坐浩訶淚盈把冉冉征途閒誰是長年者

九成宮

蒼山入百里崖斷如杵臼曾宮憑風迥岌業土囊口立
神扶棟樑鑿翠開戶牖其陽產靈芝其陰宿牛斗紛披
長松倒揭嶸恠石走哀猿啼一聲客淚迸林藪荒哉隋
家帝製此今頽朽向使國不亡焉爲巨唐有雖無新增
脩尚置官居守巡非瑤水遠迹是雕牆後我來屬時危
仰望嗟歎久天王守太白駐馬更搔首

自京赴奉先縣詠懷五百字

杜陵有布衣老大意轉拙許身一何愚竊比稷與契居
然成濩落白首甘契闊蓋棺事則已此志常覲豁窮年

憂黎元嘆息腸內熱取笑同學翁浩歌彌激烈非無江
海志蕭灑送日月生逢堯舜君不忍使永訣當今廊廟
具構厦豈云缺葵藿傾太陽物性固莫奪顧惟螻蟻輩
但自求其穴胡爲慕大鯨輒擬偃溟渤以茲悟生理獨
恥事干謁兀兀遂至今忍爲塵埃沒終愧巢與由未能
易其節沈飲聊自適放歌頗愁絕歲暮百草零疾風高
岡裂天衢陰崢嶸客子中夜發霜嚴衣帶斷指直不得
結凌晨過驪山御榻在端嶠蚩尤塞寒空蹴踏崖谷滑
瑤池氣鬱律羽林相摩戛君臣留懽娛樂動殷摻嶠賜
浴皆長纓與宴非短褐彤庭所分帛本自寒女出鞭撻
其夫家聚斂貢城闕聖人筐篚恩實欲邦國活臣如忽
至理君豈棄此物多士盈朝廷仁者宜戰慄况聞內金
盤盡在衛霍室中堂舞神仙煙霧散玉質煖客貂鼠裘

悲管逐清瑟勸客駝蹄羹霜橙壓香橘朱門酒肉臭路
有凍死骨榮枯咫尺異惆悵難再述北轅就涇渭官渡
又改轍群水從西下極目高崕兀疑是崆峒來恐觸天
柱折河梁幸未拆枝撐聲憲宰行旅相攀援川廣不可
越老妻旣異縣十口隔風雪誰能久不顧庶往共飢渴
入門聞號咷幼子飢已卒吾寧捨一哀里巷亦嗚咽所
愧爲人父無食致夭折豈知秋未登貧窶有倉卒生常
免租稅名不隸征伐撫迹猶酸辛平人固騷屑默思失
業途因念遠戍卒憂端齊終南頽洞不可掇

前出塞七首

戚戚去故里悠悠赴交河公家有程期亡命嬰禍羅君
已富土境開邊一何多棄絕父母恩吞聲行負戈
磨刀鳴咽水水赤刃傷手欲輕腸斷聲心緒亂已久丈

夫誓許國憤惋復何有功名圖麒麟戰骨當速朽
迢迢萬餘里領我赴三軍軍中異苦樂主將寧盡聞隔
河見胡騎倏忽數百群我始爲奴僕幾時樹功勳
挽弓當挽疆用箭當用長射人先射馬擒賊先擒王殺
人亦有限列國自有疆苟能制侵凌豈在多殺傷
驅馬天雨雪軍行入高山逕危抱寒石指落曾冰閒已
去漢月遠何時築城還浮雲暮南征可望不可攀
單于寇我壘百里風塵昏雄劍四五動彼軍爲我奔虜
其名王歸繫頸授轅門潛身備行列一勝何足論
從軍十餘年能無分寸功衆人貴苟得欲語羞雷同中
原有鬪爭况在狄與戎丈夫四方志安可辭固窮

後出塞四首

男兒生世間及壯當封侯戰伐有功業焉能守舊立召

募赴薊門軍動不可留千金買馬鞍百金裝刀頭閭里
送我行親戚擁道周班曰居上列酒酣進庶羞少年別
有贈含笑看吳鉤朝進東門營暮上河陽橋落日照大
旗馬鳴風蕭蕭平沙列萬幕部伍各見招中天懸明月
令嚴夜寂寥悲笳數聲動壯士慘不驕借問大將誰恐
是霍嫖姚

古人重守邊今人重高勳豈知英雄主出師亘長雲六
合已一家四夷且孤軍遂使貔虎士奮身勇所聞拔劍
擊大荒日收胡馬群誓開玄冥北持以奉吾君
獻凱日繼踵兩蕃靜無虞漁陽豪俠地擊鼓吹笙竽雲
帆轉遼海粳稻來東吳越羅與楚練照耀輿臺軀主將
位益崇氣驕凌上都邊人不敢議議者死路衢

北征

皇帝二載秋閏八月初吉杜子將北征蒼茫問家室維
時遭艱虞朝野少暇日顧慚恩私被詔許歸蓬革拜辭
詣闕下怵惕久未出雖乏諫諍姿恐君有遺失君誠中
興主經緯固密勿東胡反未已臣甫憤所切揮涕戀行
在道途猶恍惚乾坤含瘡痍憂虞何時畢靡靡踰阡陌
人煙眇蕭瑟所遇多被傷呻吟更流血回首鳳翔縣旌
旗晚明滅前登寒山重屢得飲馬窟邠郊入地底涇水
中蕩瀟猛虎立我前蒼崖吼時裂菊垂今秋花石載古
車轍青雲動高興幽事亦可悅山果多瑣細羅生雜橡
栗或紅如丹砂或黑如點漆雨露之所濡甘苦齊結實
細思桃源內益歎身世拙坡陀望鄜時谷巖互出沒我
行已水濱我僕猶木末鷓鴣鳴黃桑野鼠拱亂穴夜深
經戰場寒月照白骨潼關百萬師往者散何卒遂令半

秦民殘害為異物况我墮胡塵及歸盡華髮經年至茅
屋妻子衣百結慟哭松聲回悲泉共幽咽平生所嬌兒
顏色白勝雪見耶背面啼垢膩脚不襪床前兩小女補
綻纔過膝海圖圻波濤舊繡移曲折天吳及紫鳳顛倒
在短褐老夫情懷惡嘔泄卧數日那無囊中帛救汝寒
凜慄粉黛亦解包衾裯稍羅列瘦妻面復光癯女頭自
擲學母無不為曉粧隨手抹移時施朱鉛狼藉畫眉闊
生還對童稚似欲忘飢渴問事競挽鬚誰能即噴喝翻
思在賊愁甘受雜亂聒新歸且慰意生理焉得說至尊
尚蒙塵幾日休練卒仰看天色改旁覺妖氣豁陰風西
北來慘澹隨回鶻其王願助順其俗喜馳突送兵五千
人驅馬一萬匹此輩少為貴四方服勇決所用皆鷹騰
破敵過箭疾聖心頗虛佇時議氣欲奪伊洛指掌收西

京不足拔官軍請深入蓄銳伺俱發此舉開青徐旋瞻
略恒碣昊天積霜露正氣有肅殺禍轉亡胡歲勢成擒
胡月胡命其能久皇綱未宜絕憶昨狼狽初事與古先
別奸臣競殖醢同惡隨蕩析不聞夏殷衰中自誅褒妲
周漢獲再興宣光果明拓桓桓陳將軍仗鉞奮忠烈微
爾人盡非于今國猶活淒涼大同廢寂寞白獸闐都人
望翠華佳氣向金闕園陵固有神掃洒數不缺煌煌太
宗業樹立甚宏達

羌村三首

崢嶸赤雲西日脚下平地柴門烏雀噪歸客千里至妻
孥恠我在驚走還拭淚世亂遭飄蕩生理偶然遂鄰人
滿牆頭感歎亦歔歔夜闌更秉燭相對如夢寐
晚歲迫偷生還家少歡趣嬌兒不離膝畏我復却去憶

昔好追涼故繞池邊樹蕭蕭北風勁撫事煎百慮賴知
禾黍收已覺糟床注如今足斟酌且用慰遲暮

群雞正亂叫客至雞鬪爭驅雞上樹木始聞扣柴荆父
老四五人問我久遠行手中各有携傾榼濁復清苦辭
酒味薄黍地無人耕兵革既未息兒童盡東征請爲父
老歌艱難媿深情歌罷仰天歎四座淚縱橫

新安吏

客行新安道喧呼聞點兵借問新安吏縣小更無丁府
帖昨夜下次選中男行中男絕短小何以守王城肥男
有母送瘦男獨伶俜白水暮東流青山猶哭聲莫自使
眼枯收汝淚縱橫眼枯却見骨天地終無情我軍取相
州日夕望其平豈意賊難料歸軍星散營就糧近故壘
練卒依舊京掘壕不到水牧馬役亦輕况乃王師順撫

養甚分明送行勿泣血僕射如父兄

留花門

北門天驕子飽肉氣勇決高秋馬肥健挾矢射漢月自古以爲患詩人厭薄伐脩德使其來羈縻固不絕胡爲傾國至出入暗金闕中原有驅除隱忍用此物公主歌黃鵠君王指白日連營屯左輔百里見積雪長戟烏休飛哀笳曉幽咽田家最恐懼麥倒桑枝折沙苑臨清渭泉香草豐潔渡河不用船千騎常撒烈胡塵踰太行雜種抵京實花門既須留原野轉蕭瑟

同諸公登慈恩寺塔

高標跨蒼天烈風無時休自非曠士懷登茲翻百憂方知象教力足可追冥搜仰穿龍蛇窟始出枝撐幽七星在北戶河漢聲西流羲和鞭白日少昊行清秋秦山忽破碎涇渭不可求俯視但一氣焉能辨皇州回首叫虞舜蒼梧雲正愁惜哉瑤池飲日晏崑崙丘黃鵠去不息哀鳴何所投君看隨陽鴈各有稻梁謀

夢李白二首

死別已吞聲生別常惻惻江南瘴癘地逐客無消息故人入我夢明我長相憶恐非平生魂路遠不可測魂來楓林青魂返關塞黑君今在羅網何以有羽翼落日滿屋梁猶疑照顏色水深波浪闊無使蛟龍得

浮雲終日行游子久不至三夜頻夢君情親見君意告歸常局促苦道來不易江湖多風波舟楫恐失墜出門搔白首若負平生志冠蓋滿京華斯人獨顛顛孰云網恢恢將老身反累千秋萬歲名寂寞身後事

杜鵑

西川有杜鵑東川無杜鵑涪萬無杜鵑雲安有杜鵑我
昔游錦城結廬錦水邊有竹一頃餘喬木上參天杜鵑
暮春至哀哀叫其閒我見常再拜重是古帝魂生子百
鳥巢百鳥不敢嗔仍為餒其子禮若奉至尊鴻鴈及羔
羊有禮太古前行飛與跪乳識序如知恩聖賢古法則
付與後世傳君看禽鳥情猶解事杜鵑今忽暮春閒值
我病經年身病不能拜淚下如迸泉

塞廬子

五城何迢迢迢迢隔河水邊兵盡東征城內空荆杞思
明割懷衛秀巖西未已迴略大荒來崑函蓋虛爾延州
秦北戶關防猶可倚焉得一萬人疾驅塞廬子岐有薛
大夫旁制山賊起近聞昆戍徒為退三百里廬關振兩
寇深意實在此誰能叫帝閭胡行速如鬼

義鵲

陰崖有蒼鷹養子黑栢巔白蛇登其巢吞噬恣朝食雄
飛遠求食雌者鳴辛酸力彊不可制黃口無半存其父
從西歸翻身入長煙斯須領健鵲痛憤寄所宣斗上揆
孤影噉乳來九天脩鱗脫遠枝巨穎折老拳高空得躡
蹬短草辭蜿蜒折尾能一掉飽腸皆已穿生雖滅衆雛
死亦垂千年物情有報復快意貴目前茲實鷲鳥最急
難心炯然功成失所在用舍何其賢近經滴水涸此事
樵夫傳飄蕭覺素髮凜欲衝儒冠人生許與分只在顧
盼閒聊為義鵲行用激壯士肝

晦日尋崔戢李封

朝光入甕牖尸寢驚弊裘起行視天宇春氣漸和柔興
來不暇懶今晨梳我頭出門無所待徒步覺自由杖藜

復恣意免值公與侯
晚定崔李交會心真
罕儔每過得酒傾二
宅可淹留喜結仁里
權况因今節求李生
園欲荒舊竹頗脩脩
引客看掃除隨時成
獻酬崔侯初筵色已
畏空尊愁未知天下
士至性有此不草芽
既青出蜂聲亦煖遊
思見農器陳何當甲
兵休上古葛天氏不
貽黃屋憂至今阮籍
等熟醉爲身謀威鳳
高其翔長鯨吞九州
地軸爲之翻百川皆
亂流當歌欲一放淚
下恐莫收濁醪有妙
理庶用慰沈浮

喜晴

皇天久不雨既雨晴
亦佳出郭眺西郊蕭
蕭春增華青熒陵陂
麥窈窕桃李花春夏
各有實我飢豈無涯
干戈雖橫放慘澹鬪
龍蛇甘澤不猶愈且
耕今未賒丈夫則帶
甲婦女終在家力難
及黍稷得種菜與麻
千載商山芝往者東
門瓜其人骨已朽此
道誰疵瑕英賢遇輒
軻遠引蟠泥沙顧慙
昧所適迴首白日斜
漢陰有鹿門滄海有
靈查焉能學衆口咄
咄空咨嗟

送長孫九侍御赴武威判官

驄馬新鑿蹄銀鞍被
來好繡衣黃白郎騎
向交河道問君適萬
里取別何草草天子
憂涼州嚴程到須早
去秋群胡反不得無
電掃此行收遺氓風
俗方再造族父領元
戎名聲閣中老奪我
同官良飄飄按城堡
使我不能餐令我惡
懷抱若人才思闊漠
漲浸絕島罇前失詩
流塞上得國寶皇天
悲送遠雲雨白浩浩
東郊尚烽火朝野色
枯槁西極柱亦傾如
何正穹昊

有懷台州鄭十八司戶

天台隔三江風浪無
晨暮鄭公縱得歸老
病不識路昔

如水上鷗今如冑中兔性命由他人悲辛但狂顧山鬼
獨一脚蝮蛇長如樹呼號旁孤城歲月誰與度從來禦
魑魅多爲才名誤夫子愁阮流更被時俗惡海隅微小
吏眼暗髮垂素黃帽映青袍非供折腰具平生一盃酒
見我故人遇相望無所成乾坤奔迴互

石壕吏

暮投石壕村有吏夜捉人老翁踰牆走老婦出門看吏
呼一何怒婦啼一何苦聽婦前致詞三男鄴城戍一男
附書至二男新戰死存者且偷生死者長已矣室中更
無人唯有乳下孫孫有母未去出入無完裙老嫗力雖
衰請從吏夜歸急應河陽役猶得備晨炊夜久語聲絕
如聞泣幽咽天明登前途獨與老翁別

新婚別

兔絲附蓬麻引蔓故不長嫁女與征夫不如棄路傍結
髮爲妻子席不暖君床暮婚晨告別無乃太匆忙君行
雖不遠守邊赴河陽妾身未分明何以拜姑嫜父母養
我時日夜令我藏生女有所歸雞狗亦得將君今往死
地沈痛迫中腸誓欲隨君往形勢反蒼黃勿爲新婚念
努力事戎行婦人在軍中兵氣恐不揚自嗟貧家女久
致羅襦裳羅襦不復施對君洗紅粧仰視百鳥飛大小
必雙翔人事多錯迕與君求相望

垂老別

四郊未寧靜垂老不得安子孫陣亡盡焉用身獨完投
杖出門去同行爲辛酸幸有牙齒存所悲骨髓乾男兒
既介冑長揖別上官老妻卧路啼歲暮衣裳單孰知是
死別且復傷其寒此去必不歸還聞勸加食土門壁甚

堅杏園度亦難勢異鄴城下縱死時猶寬人生有離合
豈擇衰盛端憶昔少壯時遲迴竟長歎萬國盡征戍烽
火被岡巒積屍草木腥流血川原丹何鄉為樂土安敢
尚盤桓棄絕蓬室居塌然摧肺肝

無家別

寂寞天寶後園廬但蒿藜我里百餘家世亂各東西存
者無消息死者為塵泥賤子因陣敗歸來尋舊蹊久行
見空巷日瘦氣慘悽但對狐與狸豎毛怒我啼四鄰何
所有一二老寡妻宿鳥戀本枝安辭且窮棲方春獨荷
鉏日暮還灌畦縣令知我至召令習鼓鼙雖從本州役
內顧無所携近行止一身遠去終轉迷家鄉既蕩盡遠
近理亦齊永痛長病母五年委溝谿生我不得力終身
兩酸嘶人生無家別何以為蒸藜

夏日歎

夏日出東北陵天經中街朱光徹厚地鬱蒸何由開上
蒼久無雷無乃號令乖雨降不濡物良田起黃埃飛鳥
苦熱死池魚涸其涯萬人尚流冗舉目唯蒿萊至今大
河北化作虎與豺浩蕩想幽薊王師安在哉對食不能
食我心殊未諧眇然貞觀初難與數子偕

夏夜歎

永日不可暮炎蒸毒我腸安得萬里風飄飄吹我裳昊
天出華月茂林延踈光仲夏苦夜短開軒納微涼虛明
見纖毫羽蟲亦飛揚物情無巨細自適固其常念彼荷
戈士窮年守邊疆何由一洗濯執熱互相望竟夕擊刀
斗喧聲連萬方青紫雖被體不如早還鄉北城悲笳發
鸛鶴鳴且翔况復煩促倦激烈思時康

遣興九首

朔風飄胡鴈慘澹帶砂礫長林何蕭蕭秋草凄更碧北
里富薰天高樓夜吹笛焉知南鄰客九月猶絺綌
長陵銃頭兒出獵待明發駢弓金瓜鐫白馬蹴微雲未
知所馳逐但見暮光滅歸來懸兩狼門戶有旌節
漆有用而割膏以明自煎蘭摧白露下桂折秋風前府
中羅舊尹沙道尚依然赫赫蕭京兆今為時所憐
朝逢富家葬前後皆輝光共指親戚大總麻百夫行送
者各有死不須羨其強君看束縛去亦得歸山岡
蓬生非無根漂蕩隨高風天寒落萬里不復歸本叢客
子念故宅三年門巷空悵望但烽火戎車滿關東生涯
能幾何常在羈旅中

我今日夜憂諸弟各異方不知死與生何況道路長避

寇一分散飢寒永相望豈無柴門歸欲出畏虎狼仰視
雲中鴈禽鳥亦有行

昔在洛陽時親友相追攀送客東郊道遨遊宿南山煙
塵阻長河樹羽成臯閒回首載酒地豈無一日還丈夫
貴壯健慘戚非朱顏

下馬古戰場四顧但茫然風悲浮雲去黃葉墜我前朽
骨穴螻蟻又為蔓草纏老故行歎息今人尚開邊漢虜
互勝負封疆不常全安得廉頗將三軍同晏眠

高秋登寒山南望馬邑州降虜東擊胡壯健盡不留穹
廬莽牢落上有行雲愁老弱哭道路願聞甲兵休鄴中
事反覆死人積如丘諸將已茅土載驅誰為謀

發秦州

我衰更嬾拙生事不自謀無食問樂土無衣思南州漢

源十月交天氣涼如秋草木未黃落况聞山水幽栗亭
名更嘉下有良田疇充腸多暑預崖蜜亦易求密竹復
冬筭清池可方舟雖傷旅寓遠庶遂平生游此邦俯要
衝實恐人事稠應接非本性登臨未銷憂谿谷無異石
塞田始徵收豈復慰老夫惘然難久留日色隱孤戍烏
啼滿城頭中宵驅車去飲馬寒塘流磊落星月高蒼茫
雲霧浮大哉乾坤內吾道長悠悠

喜雨

春早天地昏日色赤如血農事都已休兵戍况巖屑巴
人困軍須慟哭厚土熱滄江夜來雨真宰罪一雪穀根
小蘇息疹氣終不滅何由見寧歲解我憂思結崢嶸群
山雲交會未斷絕安得鞭雷公滂沱洗吳越

病栢

有栢生崇岡童童狀車蓋偃蹇龍虎姿主當風雲會神
明依正直故老多再拜豈知千年根中路顏色壞出非
不得地蟠據亦高大歲寒忽無憑日夜柯葉改丹鳳領
九雛哀鳴翔其外鷓鴣志意滿養子穿穴內客從何鄉
來佇立久吁恠靜求元精理浩蕩難倚賴

過津口

南岳自茲近湘流東逝深和風引桂楫春日漲雲岑回
首過津口而多楓樹林白魚困密網黃鳥喧嘉音物微
限通塞惻隱仁者心甕餘不盡酒膝有無聲琴聖賢兩
寂寞眇眇獨開襟

潼關吏

士卒何草草築城潼關道大城鐵不如小城萬丈餘借
問潼關吏脩關還備胡要我下馬行爲我指山隅連雲

列戰格飛鳥不能踰胡來但自守豈復憂西都文人視
要處窄狹容單車艱難奮長戟千古用一夫哀哉桃林
戰百萬化為魚請囑防關將慎勿學哥舒

石龕

熊羆咆我東虎豹號我西我後鬼長嘯我前猱又啼天
寒昏無日山遠道路迷驅車石龕下仲冬見虹霓伐竹
者誰子悲歌上雲梯為官采美箭五歲供梁齊苦云直
籓盡無以充提携奈何漁陽騎颯颯驚蒸黎

述古二首

赤驥頓長纓非無萬里姿悲鳴淚至地為問馭者誰鳳
凰從天來何意復高飛竹花不結實念子忍朝飢古時
君臣合可以物理推賢人識定分進退固其宜
市人日中集於利競錐刀置膏烈火上哀哀自煎熬農

人望歲稔相率除蓬蒿所務殺為本邪嬴無乃勞舜舉
十六相身導道何高秦時任商鞅法令如牛毛

戲簡蘇廣文兼呈蘇司業

廣文到官舍繫馬堂堦下醉即騎馬歸頗遭官長罵才
名三十年坐客寒無氈近有蘇司業時時與酒錢

佳人

絕代有佳人幽居在空谷自云良家子零落依草木關
中昔喪敗兄弟遭殺戮官高何足論不得收骨肉世情
惡衰歇萬事隨轉燭夫婿輕薄兒新人羨如玉合昏尚
知時鴛鴦不獨宿但見新人笑那聞舊人哭在山泉水
清出山泉水濁侍婢賣珠迴產蘿補茅屋摘花不插髮
采栢動盈掬天寒翠袖薄日暮倚脩竹

贈韋左丞

紈袴不餓死儒冠多謾身
文人試靜聽賤子請具陳
甫昔少年日早充觀國賓
讀書破萬卷下筆如有神
賦料揚雄敵詩看子建
親李邕求識面王翰願卜鄰
自謂頗挺出立登要路津
致君堯舜上再使風俗淳
此意竟蕭條行歌非隱淪
騎驢三十載旅食京華春
朝扣富兒門暮隨肥馬塵
殘盃與冷炙到處潛悲辛
主上頃見徵歛然欲求伸
青冥却垂翅蹭蹬無縱鱗
甚愧丈人厚甚知丈人真
每於百寮上猥誦佳句新
竊效貢公喜難甘原憲貧
焉能心快快祇是走跋跋
今欲東入海即將西去秦
尚憐終南山回首清渭濱
常擬報一飯况懷辭大臣
白鷗波浩蕩萬里誰能馴

贈衛八處士

人生不相見動如參與商
今夕復何夕共此燈燭光
少

壯能幾時鬢髮各已蒼
訪舊半為鬼驚呼熱中腸
焉知二十載重上君子堂
昔別君未婚兒女忽成行
怡然敬父執問我來何方
問答未及已兒女羅酒漿
夜雨剪春韭新炊聞黃梁
主稱會面難一舉累十觴
亦不醉感子故意長
明日隔山岳世事兩茫茫

赤谷

天寒霜雪繁遊子有所之
豈但歲月暮重來未有期
晨發赤谷亭險艱方自茲
亂石無改轍我車已載脂
山深苦多風落日童稚飢
悄然村墟迴煙火無田追
貧疴轉零落故鄉不可思
常恐死道路未為高人嗤

寒碇

行邁日悄悄山谷勢多端
雲門轉絕岸積阻霾天寒
寒碇不可度我實衣裳單
况當仲冬交泝公增波瀾
野人

尋煙語行子傍水食此生免荷父未敢辭路難

成都府

翳翳桑榆日照我征衣裳我行山川異忽在天一方但
逢新人民未卜見故鄉大江東流去遊子去日長曾城
填華屋季冬樹木蒼喧然名都會吹簫聞笙簧信羨無
與適側身望川梁鳥雀夜各歸中原杳茫茫初月出不
高衆星尚爭光自古有羈旅我何苦悲傷

寓言二首

賈幼幾

名至洛陽人
禮部侍郎

凜凜秋閨夕綺羅知早寒玉砧調鳴杵始擣機中紈憶
昨別離日桐花覆井欄今來思君時白露盈塔溥聞有
關河信欲寄雙玉盤玉以委貞心盤以薦嘉殮嗟君在
萬里使妾衣帶寬

春草紛碧色佳人曠無期悠哉千里心欲採商山芝歎

惜良會晚如何桃李時懷君晴川上佇立夏雲滋

擬古五首

韋應物

辭君遠行邁飲此長恨端已謂道里遠如何中嶮艱流
水赴大壑孤雲還暮山無情尚有歸行子何獨難驅車
背鄉國朔風卷行迹嚴冬霜斷肌日入不遑息憂懼客
髮變寒暑人事易中心君詎知冰玉徒貞白
春至林木變洞房夕含清單居誰能裁好鳥對我鳴良
人久燕趙新愛移平生別時雙鴛綺留此千恨情碧草
生舊迹綠琴歇芳聲思將魂夢懼反側寐不成攬衣迷
所次起望空前庭孤影中自惻不知雙涕零

月滿秋夜長驚鳥號北林天河橫未落斗柄當西南寒
蛩悲洞房好鳥無遺音商飈一夕至獨宿懷重衾舊交
日千里隔我浮與沈人生豈草木寒暑移此心

黃鳥何關關幽蘭亦靡靡此時深閨婦日照紗窗裏娟
娟雙青娥微微啓玉齒自惜桃李年誤身遊俠子無事
久離別不知今生死

有客天一方寄我孤桐琴迢迢萬里隔託此傳幽音冰
霜中自結龍鳳相與吟絃以明直道漆以固交深

雜體三首

沈沈匣中鏡為此塵垢蝕暉光何所如月在雲中黑南
金既雕錯鑿帶共輝飾空存鑑物名坐使妍媸惑美人
竭肝膽思照冰玉色自非磨瑩工日日空歎息

同聲自相應體質不必齊誰知賈人鐸能使大樂諧鏗
鏘發宮徵和樂變其哀人神既昭享鳳鳥亦下來豈非
至賤物一奏升天階物情苟有合莫問玉與泥

碌碌荆山璞卞和獻君門荆璞非有求和氏非有思所

獻知國寶至公不待言是非吾欲默此道今豈存

新秋夜寄諸弟

兩地俱秋夕相望共星河高梧一葉下空齋歸思多方
用憂人瘼况自抱微病無將別來近顏鬢已蹉跎

高陵書懷寄三原盧少府

直方難為進守此微賤端開卷不及顧沈埋案牘聞兵
凶又相踐徭賦豈得閑促戚下可哀寬政身致患日夕
思自退出門望故山君心倘如此携手相與還

初發揚子寄元大校書

淒淒去親愛泛泛入煙霧歸棹洛陽人殘鍾廣陵樹今
朝此為別何處還相遇世事波上舟汎洄安得住

淮上即事寄廣陵親故

前舟已眇眇欲渡誰相待秋山起暮鍾楚雨連滄海風

波離思滿宿昔容鬢改獨鳥下東南廣陵何處在

秋夜南宮寄澧上二弟及諸生

曠色起煙閣沈抱積離憂况茲風雨夜蕭條梧葉秋空
宇感涼至頽顏驚歲周日夕遊闕下山水憶同遊

寄暢當

寇賊起東山英俊方未閑聞君新應募籍籍動京關出
身文翰場高步不可攀青袍未及解白羽插腰閒昔為
瓊樹枝今有風霜顏秋郊細柳道走馬一夕還丈夫當
為國破敵如摧山何必事州府坐使鬢毛斑

南園陪王卿遊矚

形迹雖拘檢世事澹無心郡中多山水日夕聽幽禽几
閣文墨暇園林春景深雜花芳意散綠池暮色沈君子
有高躅相携在幽尋一酌何為貴可以寫冲襟

春游南亭

川明氣已變巖寒雲尚擁南亭草心綠春塘泉脉動景
照聽禽響雨餘看柳重逍遙池館華益媿專城寵

幽居

貴賤雖異等出門皆有營獨無外物牽遂此幽居情微
雨夜來過不知春草生青山忽已曙鳥雀繞舍鳴時與
道人偶或隨樵者行自當安蹇劣誰謂薄世榮

郊居言志

負暄衡門下望雲歸遠山但要樽中物餘事豈相關交
無是非責且得任疎頑日夕臨清澗逍遙思慮閑出去
唯空屋弊簣委窓閒何異林棲鳥戀此復來還世榮斯
猶已頽志亦何攀唯當歲豐熟閭里一歡顏

夏景端居即事

北齋有涼氣嘉樹對層城重門永日掩清池夏雲生遇
此庭訟簡始聞蟬初鳴逾懷故園愴默默以絨情

送終

奄忽逾時節日月獲其良蕭蕭車馬悲祖載發中堂生
平同此居一旦異存亡斯須亦何益終復委山岡行出
國南門南望鬱蒼蒼日入乃云造慟哭宿風霜晨遷俯
玄廬臨訣但違違方當求潛翳仰視白日光俯仰遽終
畢封樹已荒涼獨留不得還欲去結中腸童稚知所失
啼號捉我裳即事猶倉卒歲月始難忘

宴別幼遐與君貺兄弟

乖闕意方弭安知忽來翔累日重懽宴一旦復離傷置
酒慰茲夕秉燭坐華堂契闊未及展晨星出東方征人
慘已辭車馬儼成裝我懷自無懼原野滿春光群水含

時澤野雉鳴朝陽平生有壯志不覺淚霑裳况自守空
宇日夕但徬徨

留別洛京親友

握手出都門駕言適京師豈不懷舊廬惆悵與子辭麗
日坐高閣清觴讌華池昨遊倏已過後遇良未知念結
路方永歲陰野無暉單車我當前暮雪子獨歸臨流一
相望零淚忽霑衣

西郊燕集

濟濟衆君子高燕及時光群山靄遐矚綠野布熙陽列
坐遵曲岸披襟襲蘭芳野庖薦嘉魚激澗泛羽觴衆鳥
鳴茂林綠草延高岡盛時易徂謝浩思坐飄颺眷言同
心友茲遊安可忘

登西南岡卜居遇雨尋竹浪至澧壩縈帶數里

清流茂樹雲物可賞

登高創危構林表見川流微雨颯已至蕭條川氣秋下
尋密竹盡忽曠沙際遊紆直水分野繚延稼盈疇寒花
明廢墟樵牧哭榛丘雲水成陰澹竹樹更清幽適自戀
佳賞復茲求日留

寄子西

夏景已難度懷賢思方續喬樹落疎陰微風散煩燠傷
離枉芳札忻遂見心曲藍上舍已成田家雨新足託鄰
素多欲殘秩猶見東日夕上高齋但望東原綠

出還

昔出喜還家今還獨傷意入室掩無光銜哀寫虛位悽
悽動幽幔寂寂驚寒吹幼女復何知時來庭下戲咨嗟
日復老錯莫身如寄家人勸我餐對案空垂淚

酬盧嵩秋夜見寄

喬木生夜涼月華滿前墀去君咫尺地勞君千里思素
秉棲遁志况貽招隱詩坐見林木榮願赴滄洲期何能
待歲晏携手當此時

與韓庫部會王祠曹宅作

閑門蔭堤柳秋渌含夕清微風送荷氣坐客散塵纓守
嘿共無悵抱冲俱寡營良時頗高會琴醞共開情

南塘泛舟會元六昆季

端居倦時燠輕舟泛回塘微風飄襟散橫吹繞林長雲
澹水容夕雨微荷氣涼一寫惰勤意寧用訴華觴

夏日

已謂心苦傷如何日方永無人不晝寢獨坐山中靜悟
澹將遺慮學空庶遺境積俗易爲侵愁來復難整

閑齋對雨

幽獨自盈抱陰澹亦連朝空齋對高樹疎雨共蕭條巢
燕翻泥濕蕙花依砌消端居念往事倏忽若驚飈

春日郊居寄萬年吉少府中孚三原元少府偉
夏侯校書審

谷鳥時一嘯田園春雨餘光風動林早高窓照日初獨
飲澗中水吟詠老氏書城闕應多事誰憶此閑居

起度律師同居東齋院

釋子喜相偶幽林俱避喧安居同僧夏清夜諷道言對
閣景恒晏步庭陰始繁逍遙無一事松風入南軒

夕次盱眙縣

落帆逗淮鎮停舫臨孤驛浩浩風起波冥冥日沈夕人
歸山郭暗鴈下蘆洲白獨夜憶秦關聽鐘未眠客

神靜師院

青苔幽巷徧新林露氣微經聲在深竹高齋獨掩扉憩
樹愛嵐嶺聽禽悅朝暉方耽靜中趣自與塵世違

長安遇馮著

客從東方來衣上灞陵雨問客何為來采山因買斧冥
冥花正開颺颺燕新乳昨別今已春鬢絲生幾縷

暮相思

朝出自不還暮歸花盡發豈無終日會惜此花閒月空
館忽相思微鐘坐來歇

送李十四山東遊

聖朝有遺逸披膽謁至尊豈是賢榮寵誓將救元元權
豪非所便書奏寢禁門高歌長安酒忠憤不可吞欵來
客河洛日與靜者論濟世翻小事丹砂駐精魂東遊無

復繁梁楚多大藩高論動侯伯踈懷脫塵喧送君都門
野飲我林中樽立馬望東道白雲滿梁園踟躕欲何贈
空是平生言

送李儋

別離何從生乃在親愛中反念行路子拂衣自西東日
具不留宴嚴車出崇墉行遊非所樂端憂道未通春野
百卉發清川思無窮芳時坐離散世事誰可同歸當掩
重關默默想音容

送李侍御益赴幽州幕

二十揮篇翰三十窮典墳辟書五府至名爲四海聞始
從車騎幕今赴嫖姚軍契闊晚相遇草幟遽離群悠悠
行子遠眇眇川塗分登高望燕代日夕生夏雲司徒擁
精甲誓將除國氛儒生幸持斧可以佐功勳無言羽書

急坐闕相思文

寄大梁諸友

分竹守南譙弭節過梁池雄都衆君子出餞擁河湄燕
謔始云洽方舟已解維一爲風水便但見山川馳昨日
次睢陽今夕宿符離雲樹愴重疊煙波渺還期相敦在
動事海內方勞師

冬至夜寄京師諸弟兼懷崔水部

理郡無異政所憂在素食徒令去京國羈旅當歲寒子
月生一氣陽景極南端已懷時節感更抱離別酸私宴
席云罷還齊夜方闌邃宇沈空幕孤燭照林單應同茲
夜念寧忘故歲懼川塗恍悠邈涕下一闌干

軍中冬燕

滄海已云晏皇恩猶念勤式燕徧恒秩柔遠及斯人茲

邦實大藩伐鼓軍樂陳是時冬服成我士氣益振虎竹
謬朝寄英賢降上賓徒罄周旋禮愧無海陸珍庭中九
劍闌堂上歌吹新光景不知晚觥酌豈言頻單醪昔所
感大醜况同欣顧謂軍中士仰答何由申

題劉相公三湘圖

郎君胃

昔別醉衡霍爾來憶南州今朝平津邸兼得瀟湘遊稍
辨荆門樹依然芳杜洲微晴三巴峽咫尺萬里流去鳥
不知倦遠帆生暮愁涔陽指天末北渚空悠悠枕上見
漁父座中常狎鷗誰言魏闕下自有東山幽

岳州張使君與王都督別詩二首因遙申和

韋嗣立

茂先王佐才作牧楚江隈登樓正欲賦復遇仲宣來黃
鵠飛將遠雕龍文為開寧知昔聯事聽曲有餘哀

昔時陪二賢纓冕會神仙一去馳江海相逢共播遷無
因千里駕忽覩四愁篇覽諷歡無已歡終徒愴然

雜言

謝陶

天不與人言禍福能自至水火雖活人暫不得即死蹈
之焚斯須憑之溺容易水火與禍福豈有先言耳

送唐次

武伯蒼

名元衡河中人
劍門節度使

都門去馬嘶霸水東流淺青槐驛路長白日離亭晚望
望煙景微草色行人遠

秋入關

賈馳

河上微風來關頭樹初溼今朝關城吏又見孤客入上
國誰與期西來徒自急

河梁別

馬虞臣

名戴會
昌進士

河梁送別者行哭半非親此地足征戰胡天多殺人金

鬢照離席寶瑟疑殘春

月生句

劉猛

月生十五前日望光彩圓月滿十五後日畏光彩瘦不見夜花色一樽成暗酒匣中苔背銅光短不遍空不惜補明月慙無此良工

貪泉

吳處默

州名隱之廣

古人云此水一飲懷千金試使夷齊飲終當不易心

無題

李義山

名商隱懷州人

八歲偷照鏡長眉已能畫十歲去踏青夫容作裙衩十二學彈箏銀甲不曾卸十四藏六親懸知猶未嫁十五泣春風背面秋千下

春泛若耶

綦孝通

名母潛南康人

幽意無斷絕此去隨所偶晚風吹行舟花路入谿口際

夜轉西壑隔山望南斗潭煙飛溶溶林月低向後生事且彌漫願為持竿叟

村居

沈下賢

名亞之長安人

無樹巢宿鳥無酒共客醉月上蟬韻殘梧桐陰繞地獨出村舍門吟劇微風起蕭蕭蘆荻叢叫嘯如山鬼應緣我憔悴為我哭秋思

宿裴迪書齋

李觀

字元賓隴西人太子校書

卧君山牕下山鳥與我言清風何颼颼松栢中夜繁久遊夫歸趣宿此似故園林煙橫近郊谿月落古原稚子不待曉花閒出柴門

山中作

沈千運

棲隱別無事所願早離塵不辭城邑遊禮樂拘束人邇來歸山林庶事皆吾身何者為形骸誰是智與仁寂寞

了閑事然後知天真咳唾驚榮華迂俯相屈伸如何巢
與由天子不得臣

贈友人古鏡

朱晝

我有古時鏡初自壞陵得蛟龍猶泥蟠魑魅幸月蝕摩
又見菱蕊青於藍水色贈君將照心無使心受惑

誠貪

釋子蘭

多求待心足未足旋傾覆明知貪者心求榮不求辱

文翰類選大成卷第二十三

